

LA USC DI LADINS - MERCOLEDI' 23 DICEMBRE 2020

CULTURA

La radunanza de l'ICL te n video

Chest an l'apuntament per fèr cognoscer l'atività e se confrontèr con la comunanza à podù esser demò virtual. L'è a la leta l Calandèr Ladin 2021

Per solit de dezember vegn metù a jir la radunanza de l'Istitut Cultural Ladin per ge fèr cognoscer a la jent la ativitàdes portèdes inant via per l'an e i projec per l'an che vegn.

Chest an ampò no l'è stat possibol endrezèr chest emportant moment de confront per via de l'emergenza sanitèra e l'istituzion à manà fora n video per portèr dant mingol chel che l'è stat fat via per chest an particulèr, con l'envit a l condivider e a uzèr fora idees e proponetes.

La presidenta Lara Battisti à anunzià, se sarà possibol, l'intenzion de endrezèr na scontrèda en prejenza ti prumes meisc de l'an che vegn per ge dèr l dret ringraziament a l'ex diretor Fabio Chiocchetti, stat a cef del'istituzion per passa 40 egn, e a Evelyn Bortolotti che l'ha tout sù sia funzions fin a la nomina de la neva diretora Sabrina Rasom, a chela che te chela ocasion ge vegnarà sport l benvegnù ofizièl.

Adatament e rielaborazion per l Museo

L'atività del Museo, enceben condizionèda debel da la pandemia, la è jita inant de gra a n lurier fon de adatament e rielaborazion. La responsabola Daniela Brovadan à recordà che de jugn l'è stat inaudà n nef alestiment multimedièl con la contia veiora de la vivèna prejen-



N retrat del Calandèr Ladin 2021.

tèda a na vida moderna e interativa e dapò l'è stat lurà per valorisèr maormenter la sezions sul teritorie e l'è stat enjignà n picol codejel promozionèl che prejentà ensema duta la sezions. L'è stat publicà ence l liber per i più picoi «Luli e i colores», che vegn dat fora desche don de Nadèl te la scolines.

Publicazions e prum volum del Volf

La responsabola di Servijes linguistics e culturai Evelyn Bortolotti à rejonà

de la gran atività portèda inant ti archives e l'ha recordà la rica produzion de publicazions de carater scientific dates fora en cont de storia, letradura e antropologia col lurier portà inant da Fabio Chiocchetti dant de jir en penscion. L'ha recordà dapò soraldut l gran empegn tel setor linguistics per l Volf, l vocabolar del ladin fascian, che à permetù de vegnir fora con l prum volum, ence de gra al contribut de la jent de Fascia a chela che ge è stat sport n gran develpai.

Calandèr Ladin 2021

N'otra neva realizazion l'è l Calandèr Ladin 2021 dedicà ai 40 egn de la Biblioteca e ai 20 egn del Museo Ladin, coi retrac de Nicola Detomas e rencurà da Alberta Rossi, che à deschiari l'idea de meter, sul retrat de jené e de dezember, n usc avert: avert per i fascegn, acioche i sente l'Istitut desche cèsa, avert envers l passà en segn de ringraziament per chel che ne à lascià nesc aves, ma avert, vindò la cuna tel retrat de dezember, ence envers la neva generazions, l davegnir e sia endesfides. L Calandèr Ladin vegn realisà col contribut economic de la Copratives de Sèn Jan e Ciampedel e per chesta edizion l'è ruà l didament ence de la Coprativa da Moena.

La relazion de la neva diretora

La neva diretora Sabrina Rasom à portà sie salut e i programes per l davegnir: tel setor linguistics l'ha idea de lurèr su la terminologia moderna, de fèr n assestament de l'ortografia e de jir inant per portèr a compliment l Volf. Te l'atività culturèla anter la pruma scomenzadives del 2021 vegnarà recordà i 30 egn da la mort de Luigi Canori. Desvaliva scomenzadives è perverdudes dapò per i 40 egn de la biblioteca e per i 20 egn del Museo per arvejinèr la jent. Vegnarà fat na neva sezion te biblioteca dedichèda ai più picoi e lurà su la comunicazion e la promozion de la ativitàdes de Museo e Istitut per i fèr cognoscer semper micc.

CRIM